

Pa conferencia Green Aruba /EMA na october

Hulanda ta bolbe bin cu un delegacion comercial



ORANJESTAD – Un delegacion comercial bou guia di Simon Smits, director general di Ministerio di Asuntunan Economico di Exterior di Hulanda, lo participa na e evento GEMA (combinacion Green Aruba cu Europe meets the Americas) na october.

Durante e bishita di prome minister Mark Rutte aña pasa, sr. Smits tambe tabata encabeza un delegacion comercial. E tempo ey e relacion entre Aruba y Hulanda tabata miho cu e aña aki. Pero despues e conflicto riba e presupuesto, e welga di hamber di prome minister Mike Eman y hopi acusacionnan, aparentemente esaki no a haci daño na e plan di gabinete Eman na Aruba bira un 'hub' entre Europa y e region aki.

Tin resultado

Ayera gobierno a manda dos relato cu noticia hopi positivo di un encuentro na Hulanda, esta 'Green Aruba, Where Europe meets the Americas'. Esaki a wordo organisa como preparacion pe conferencia GEMA cu ta tuma luga entre 22 pa 25 di october na Aruba. Prome minister Eman tambe tabata presente y a haci un presentacion. E ta convenci cu 'e vision di su gabinete pa haci di Aruba un hub economico no ta djis un concepto mas, pero un realidad cu resultadonan concreto'. "Ta mas cu bisto cu no ta djis

un concepto cu Gobierno a trece, pero awe nos a tende di e instancianan cu ya caba tin experiencia cu establecimiento na Aruba y e entusiasmo di nan resultado. Esey ta haci cu e forsa di loke nos ta presenta a crece enormemente compara cu aña pasa." El a referi na Alberto Bos, director di Scheepvaart en Transport College (STC) como un ehempel di esey.

Den su presentacion, sr. Bos di STC a papia di e resultadonan cu ya caba nan tabatin na Aruba despues STC a tene un curso pa studiantenan di Latino America na Aruba. E instituto a dicidi cu definitivamente nan kier continua bin Aruba pa duna educacion na personanan di exterior cu kier sigui un estudio marítimo. Studiantenan interesa den estudianan marino di halto nivel a bin Aruba pa participa na cursonan cu e compania a ofrece. Esaki a haci esey mas atractivo pa esunnan di Latino America cu no mester biaha distancia largo pa esaki, segun e director.

No realistico

Tin diferencia di opinion si e plan aki realmente lo yuda e economia di Aruba. Un encuesta bou di empresarionan di Aruba recientemente, riba iniciativa di Camara di Comercio, a mostra cu e sector comercial no ta kere mucho den e plan aki. Nan ta haya mas importante cu gobierno por ehemplo cambia su organisacion den uno mas efectivo y eficiente, kita bu-

rocracia y atende kehonan. E promocion di Aruba como 'hub' sea 'gateway' nan no ta haya realistico. E empresarionan ta preferi un miho relacion cu gobierno y especificamente ta haya importante cu Aruba ta haya un defensor di pueblo.

Pero e gabinete si ta kere den en plan y ta sigui desarojo esaki. Premier Eman a indica cu e ta hopi contento cu e cantidad di persona cu a bin na e evento siman pasa pa demostra nan interes y entusiasmo. Esaki ta inclui ex prome minister di Hulanda Jan Peter Balkenende cu ta partner awor na compania di Ernst & Young, director Mart van Bracht di TNO Energy, Hans Biesheuvel di ONL (organizacion pa gremio comercial) y Alex Nieuwmeijer di e cadena di Divi na Aruba.

Den e relato di gobierno sr. Biesheuvel tambe ta elogia e plan di gobierno. "Green Gateway ta basa riba un vision hopi cla. Bo ta wak e desarojo aki na henter mundo y na Aruba, cu e ta ofrece hopi oportunidad pa crecemento na Aruba tin partnernan fantastico pa traha hunto, manera TNO cu a establece su mes algun aña atras na Aruba." Segun e, TNO a desaroja un presencia 'enorme' den e region Caribense y e ta kere cu comerciantenan Europeo por probecha di esaki.

Retraso

Aruba mes ta wardando ai-



nda pa e proyectonan 'green' duna resultado. Manera Bon Dia Aruba a publica den su edicion di 19 di augustus proyectonan sostenibel di gobierno ta tranca. Falta di presupuesto ta wordo duna como un di e motibonan. Pero tambe pa cu e parke di molina di Urirama e desarojado a duna di conoce cu e proyecto a wordo posponi pasobra gobierno tin otro prioridad. E proyecto

di Smart Community na Kibaima ta coriendo un retraso di dos luna. Y te ainda gobierno no a divulga nada di e Green Zone na Eagle, unda kier crea un parke comercial pa companianan cu produccion sostenibel local y di afo. E plan di crea un tercer pilar a base di un economia berde mester duna 1800 cupo di trabou nobo, segun e promesa di gabinete Eman durante e ultimo eleccion. □